

# PIE

par RICHARD BERENGARTEN  
(transkreation par DEV VIRAHSAWMY)

*Pie lavi grandi dousma-dousma  
atraver letan ki refiz gard kont.*

*Basilides Alexandria*

Pie plante  
dan mo nam  
fann partou grandi  
pie sante  
brans partou  
flanbwayan  
rasinn dan dife  
rouz araze  
zouzou rafal  
lezo rabote  
pie lekor  
bazik san zes  
pie dan enn lagren  
lagorz ouver net  
mil parol  
lapo dir  
pie plengne  
pa per loraz  
fer fas divan  
fer fas lanez  
pie sirvivan  
lapo-lezo  
anba toufann  
bourzonn timid  
dan dezespwar  
akous lespwar  
gran firmaman  
ar niaz leze  
lavwa lakte

zwazo revini  
  somey kase  
pie sarze ar somey  
  dan lebra souvenir  
zoli dibwa  
  liver  
lete  
  pie garni ar rev  
mesaz Bondie  
  kouver ar pwal  
ero dan pens  
  kouronn serpan  
gardien zean  
  fofile ar lavwa  
ek riye zanfane  
  pie gran dimoun  
bwar later  
  aval lesiel  
plen boyo  
  dibout drwat  
sefann rayt  
  kolonn sazes  
lafime niaz  
  fanal dan nwar  
tornad tournike  
  lasours dife  
lasenn dore  
  montre sime  
dan marenwar  
  ar kouler agat  
ek hematit  
  touletanto  
bwar laroze  
  emrod karnelian  
ek jaman  
  e dan barlizour  
dekore ar bouton  
perl ek opal  
  ki fer zot fonn  
lame-lipie large net  
  pou gramaten rantre

griyaz parfime  
travers midi  
ar kouronn ble  
pie later  
dilo dife  
pli ler ki ler  
bato leze  
salan lour  
pouse par  
labriz sezon  
lane ale  
lane vini  
amare ar later  
pie dan larad later  
lakok beni  
par vag lesiel  
berso soley  
pagne lalinn  
moulton niaz  
barik zetwal  
komet anbalans  
planet tranbleman  
galaxi lasari  
ar long golet  
lemonn kout marto  
lesiel kout rato  
pie kaser mo  
kaser grabo  
kaser lezo  
pwagne dibwa  
latour lafors  
pwen pivo  
pie-latant tini tou  
santinel  
ki vey partou  
desir lakrout  
falez kolinn  
stil poetik  
etensel nesan  
laflam irlan  
lame bazalt

ki chombo plim  
lekritir zordi  
dekore ar fey  
kouler ver ek lor  
maniskri  
ki tay parol  
dan kavo aswar  
ar plim tranpe  
dan lank epe  
nouvo parol  
koumansman  
ki sant dan nwar  
lesans likid  
lanez  
lamous later  
fossil fouzer  
ek dinozor  
pie letan  
laflam tournan  
defons laport  
lalev istwar  
pers lamaswar  
kras bann lagren  
pikan zegwi  
bourzon lastik  
dan fon sistem  
ek so lavenn  
fler koumansman  
lor tiz frazil  
larezinn mazik  
kouronn  
pie elektrik  
paratoner  
lantonwar lenerzi  
dan lespas  
lasemine sorti  
dan trou lamor  
ki donn so souf  
lane vini lane ale  
pie kreasion  
pie destriksion

tanp dan krann  
ambalao  
rasinn ranpe  
bann fib ki naz  
dan basen lizie  
ek lamaswar  
pie lemonn  
memwar istwar  
lakav anba  
montagn gratsiel  
latant zwisans  
dan natirel  
dom ki sifle  
latour tranble  
skilptir tripote  
ki tini kolinn  
konn gayar  
ki pers brouyar  
latour angriyaz  
repo bann anz  
pie vantilater  
mizikal lesiel  
lesel tipa  
pou ledwa nam  
gozie soukontrol  
glotis ar lezel  
sone sante  
pie pwatrinn  
ki fizionn  
lamizik lafore  
ar lamizik vale  
dan enn senfoni  
dirize par  
oustad Varouna  
baget mazik  
explorater  
drese kabose  
nouvo pous  
kourbe ar pwa lavi  
drese ar lespwar  
enn lakord red

ant later ek lesiel  
baget mizikal  
tilanbik  
senbol medikal  
barrtann konekte  
termomet ki mizir  
saler yer zordi dime  
nouritir vital  
tonbe leve  
tron vid troue  
lafit bondie  
danpi dibwa  
tinel miltip  
difil laklos  
poumon lanfer  
renn koutvan  
glas bann dane  
bann mor de fwa  
bann zame ne  
ar arp ki sone  
dan vale ek kleryer  
tristes verze  
ki rod protekter  
pie matris  
lalev mouye  
pie souteren  
ramas dilo lapli  
barik diven  
ermetik  
pie dezir  
ar fri pese  
lasours montagn  
kaskad  
parfen bisagn  
pie gelar  
larivier deborde  
pie volkan  
plen ar magma  
akous bann lil  
dan tourbiyon  
pie koray

toultan dan mangann  
san feyaz  
pie fouka  
pie pasion  
ar ta pikan  
transpir disan  
pie douler  
toultan la  
nouri nam-simitier  
fer zanfan ale  
pie komen  
vie-kaskase  
sirpeple diform  
pie dan lonbraz  
viktin bebet  
rasinn pouri  
nouritir zekler  
senbol lafaminn  
viole matirize  
pie lepep  
obelisk  
pie mor  
derasine koupe  
koup antrans pou fer plans  
pie domestik  
pou sofaz ek nana  
pie latab  
pou dipen ek diven  
arsitrav  
sagay mazeste  
pike dan later  
tousel fizione  
kouver ar disan  
lamal rwayal  
koulout lanfer  
dan paradi  
pie lesafo  
pa aret pouse  
lapat artrit  
kann blan aveg  
lam lepe

mari defans  
tron epe  
defans ivwar  
lans ebenn  
drese pou gagne  
pie dan laplenn  
dan zarden irben  
debranse ar swen  
par lame pran-kont  
pie trankil  
pou wi pou non  
pou sesi pou sela  
pou blan pou nwar  
rankont  
pase ar fitir  
rasinn eternal  
ki beni zordi  
pie laser  
antoure ar misk  
disan ek lasier  
pie soupire  
tranble terifie  
zenere  
pie difout  
laponp lavi  
toultan sarze  
kot so rasinn  
repo serpan  
parmi so brans  
zwazo blan badine  
pie bann lespri  
pie mari sekre  
dan fon lesiel  
fleri par lavenn  
arter ner  
pie kapiler  
lasours krwasans  
alimantasion nwaye  
dan lesiel enfini  
mo desann lao  
mont anba



milion miliar banane  
banane Adan  
ek David  
ek Satan  
ek Moiz  
lor montagn  
pie Boudha  
Tilopa  
pie zenn  
tantrik  
pie Kali  
dans lor lamor  
pie volkan  
larenn Ashtaroth  
Lilith  
Ishtar ek Astarte  
nouri  
gomon ver ek zonn  
ramas mwazi  
pie sanpiyon  
mama orkide  
ek plant parazit  
pie lespri beni  
pie Swami  
kot zaregne ranz latwal  
ek marten ranz lakaz  
ek sovsouri valse  
ek kestrel veye  
pie lavi  
pie konesans  
dinamik  
pie lang  
ki donn nom  
rakont zistwar  
istwar  
sanzman  
pie san fon  
san lafen  
pie lamitie  
oxizenn mo respire  
orizinal

sovaz  
imortel  
parasol bondie  
pie liberte  
pie lamour  
pie lazistis  
bouke larkansiel  
imen anfler

*19.05.21*